

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Chief Minister Pu Lalduhoman vawiin khan Serchhip Dist a sorkar deptt te hnena mipuiin complaint an thehluh theihna tur Vantlang Viltu Apps a tlangzarh
- 2. Private Hospital ten Mizoram Universal Health Care Scheme (MUHCS) chungchangah sorkar nen vawi duai lo an sawiho chungin inremna a la awm thei lo an ti.
- 3. Chief Electoral Officer Dr Lalrozaman an hnathawhah mipuite ti bengyar turin chanchinbumite an pawimawh avanga tha taka thawhho a pawimawh a ti.
- 4. Prime Minister Narendra Modi-a’n Pakistan nena harsatna chingfel turin India-in ram dang inrawlh tumna a pawm ngai dawn lo tih US President Donalh Trump-a a hrilh



CM

Chief Minister Pu Lalduhoman vawiin khan Serchhip Dist a sorkar deptt te hnena mipuiin complaint an neih leh, rang taka thil hriattir ngai an mobile phone hmanga an hriattir theihna tur Vantlang Viltu Apps a tlangzarh

He apps hi Serchhip Dist huam chhûngah chauh a hman theih dawn a. He apps zawmtu tute pawhin dan bawhchhiatna lam hawi thil thleng thuneitute rang takin an hrilh thei dawn a. Hei bakah hian accident leh thil dang thuneitute hrilh hmanhmawh ngai chi ah a tangkai hle tura ngaih a ni a, dik lo tak a inhêkna tur ni lovin dan dik lo a thil tih leh thil thleng chinfel thuai theih nana hmanraw tangkai tak, Meghalaya a Citizens Eye zul zuia siam a ni. Dist mipui leh deptt staff ten an hman theih ve ve tura duan a ni.

Vawiin vek khan Serchhip Bawrhsap Pisapui Conference Hall-ah MZP Headquarters Serchhip ten HSLC, HSSLC leh MPSC exama tithate lawmpuina an neih chu Chief Minister Pu Lalduhoman hian a hmanpui a.

Thu sawiin Chief Minister chuan Kumin hi Serchhip Dist tan zirna lamah kum tha niin a lang. Hman ni lawkah Mizoram chu Fully Literate State-

ah kan inpuang a, hun rei tak atang tawhin Serchhip district chu India rama district level-a literacy sang ber a ni bawk a, a inhmeh hle a ni a ti.



INTERNATIONAL DAY OF YOGA

Aizawl Civil Hospital-a AYUSH Medical Officer Dr. Laltlankimi Ralte chuan Yoga chu nitin natna hrang hrang enkawl nan tangkai taka an hman thu a sawi.

Akashvani Correspondent Vanlalruata’n a kawmnaah he thu hi sawiin Dr. Laltlankimi Ralte chuan Yoga chu natna chi hrang hrang enkawl nan an hman reng tih a sawi a. Yoga hmanga insawizawi chu Asanas tih a nih thu leh taksaah boruak tha a tihpun thu leh taksaah thil tha lo te a tihhniam theih thu a sawi a. Hei hian taksa chu mahni leh mahnia intidam turin a pui thin tih a sawi.

Dr. Laltlankimi Ralte chuan Civil Hospital-a an OPD-ah chuan a bik takin kawng na, nghawng na, zan mu tha thei lo leh adangteah an hman nasat thu a sawi a. Hei mai bakah hian natna thenkhat zunthlum, BP sang leh rilru lama harsatna neiah te an hman tangkai thu sawiin Yoga chu nu naupai lai tan pawh a tha hle tih sawiin an hman tur bik insawizawina a awm vek thu a sawi a. Naupang thang lai tan te, rilru sawrbing thei lo tante leh thil dang tam tak enkawl nan a tangkai hle a ni a ti a. Heng natna bakah a sawilan loh natna dang tam takah nitin tangkai takin Yoga chu an hman tih a sawi a ni.

International Yoga Day atan Ministry of AYUSH chuan item chi hrang hrang 10 tihtur a rawn chhawpchhuah thu leh hetah hian Mizoramah chuan thingphun ‘Harit Yoga’ leh hmun khata a huhua Yoga tih, ‘Yoga Sangama’ te tih tura ruahmanna kalpui mek a nih thu a sawi bawk.



NGHAM

Non-Government Hospital Association of Mizoram (NGHAM) chuan Mizoram sorkar Health Care Scheme duan-Mizoram Universal Health Care Scheme (MUHCS) chungchangah sorkar nen vawi duai lo an sawiho chungin inremna a la awm theih loh thu leh pawl an tih thu an sawi.

NGHAM hotute chuan MUHCS chu damlo ten Damdawi-In awmna bill an chawi ngai lo (cashless) tura ruahman a nih thu sawiin hetah hian nitina hospital-a pawisa lut a awm dawn loh thu leh nitin damlo inenkawlina chu a hautak tham em avangin ba ringawta damlo enkawl chu private hospital ten an tlin lo an ti a. Hei bakah hian MUHCS hnuaia damlo enkawlina man bithliah chu tuna private hospital te hman tlangpui aiin zaa 50 atanga zaa 80 velin a hniam zawk a. Man tlawm bawk si, a ba thlau ni bawk sia damlo enkawl tura beisei an ni chu an pawm theilo an ti a ni.

Mizoram-a private hospital-te’n damlo an enkawlina man leh room mante chu phailama private hospital tam berte aiin nasa takin a tlawm zawk tih sawiin chumi aia tlawm leh zuala damlo enkawl chu an dinhmunah thil theih loh tluk a ni an ti.

NGHAM hruaitute chuan phailama Corporate/Private Hospital, rate sang tak hmangte nen Mizoram sorkarin MUHCS inremna an ziaak thei chu tha an tih rualin Mizoram private hospital te tana rate a chhawpsak nen a inanglo hle a ni an ti a. Sawrkar sum senga enkawl, Sawrkar hospital-ten MUHCS hnuai-ah hian cashless-in damlo enkawl chu kalpui chhunzawm se, private hospital-ah erawh phailam hospital thenkhat sawrkarin a ziahluh loh leh pawm loh (Non-Empanelled Hospital)-a an phalsak ang thoin damloten an bill chu MUHCS Package Rate angin reimburse/bill leh theih se, sawrkar pawisa engmah a hek dawn lo an ti a. Hetianga Mizoram sawrkarin a tithei a nih phawt chuan mipui harsatna tam tak chu a sukiang ngei dawn tih sawiin an ni NGHAM pawhin an thlawp nghal dawn thu an sawi a ni.

<><><>

HEALTH MINISTER

Hetihlai hian Health Minister Pi Lalrinpuui chuan, MUCHS chungchangah Private Hospital te chu sumdawng an nih angin Sawrkar ruahmanna an pawm thei lo chu an hrethiam a, an thutlukna a zahawm an ti tih ZPM Office ah a sawi.

MUCHS chungchangah hian Aizawl Private Hospital te nen theih ang ang a in rawn lawkin rate chungchanga an buailoh thu sawi mah se Cashless an pawm thei lo a ni a ti a, hetihlai hian Private Hospital leh Clinic hrang hrang a miten an zawm chho mek a ni a ti a, Phai lama private hospital lian leh lar tak takte nen pawh MOU an sign chho zel a, Synod Hospital pawh in mipuite hmangaihna avangin MUHCS chu an zawm thuai an beisei, a ti.

Health Care chungchangah hian kalphung thar siamin, Health Care hmasa a step 10 vel kha step 2 ah an pawt tawi a. Tunah chuan chhungte pawisa puk ngai lo in Empanelled Hospital ah pawisa sen ngai miah lo in Civil Hospital leh ZMCH ah rei tak nghak lovin phailamah pawh a inenkawl zung zung theih tawh a ti a, vawiin thlenga phailamah an refer MUHCS zarzo tawhte chu mi 825 an tling tawh a ti.

<><><>

VIKSHIT BHARAT

Mizoram State BJP President Pu Vanlalhmuaka chuan BJP party chu hlauh chi a ni lova, chhawr chi a ni a ti.

Vawiina Lunglei YMA Conf. Hall-a Professional meet on Vikshit Bharat Ka Amrit Kaal, Seva Sushasan, Garib Kaltan Ke 11 SAAL prog. hman a ni a, he hunah hian thusawiin Pu Vanlalhmuaka chuan Pu Modi-a kaihhruai sorkarah PM Health Care chu Mizoramah mi nuai 5 in an chhawr mek a, rampumah Jan Dhan account siam in mi vbc 55 tan bank a/c hawnsak a ni a, Direct benefit transfer hmangin tanpuina an dawng a ni a ti. Insak tanpuina, Mizoramah mi 48000 tan inthiarna an siamsak a, JJM hnuaiah 124000 chuang tui an pe a, free gas connection mi 40000 chuang an pe a, PM Kissan ah mi nuai 1 aia tam an pe a, a dawng tur diktakin an dawng em tih erawh ngaihven a tul a ti.

BJP chuan Building ropui sak vak vak a tum lo a, ei leh barah India mi tumah in an nghei tur a ni lova, fur chhung june, july, Aug thla ei tur pek vek tur Central in a ti a, Mizoram sorkar chuan a phur chhuak thei lo a ni a ti. Sumdawn bul tan nan Mudra Loan mi nuai chuang in Mizoramah an chhawr mek tih record a awm a, taktak nge erawh an hrelo tih sawiin hre lova, Journalist ten lo chhuichhuak se, diklo a awm anih chuan Delhi ah an report ang a ti.

Hawkers te pawh cheng Sing 5 atanga Loan pek tur siam a ni a, an dilna Bank in a pe duh lo anih chuan Union Finance Minister ah thlen mai tur a ti a. Kuthnathawk leh dawrkai te pawhin an in tih muk nan Loan an hmuhna tur PM Viswa karma tih tur a ni a, Loan an hmu ngei ngei tur a ni a ti.

Pu Vanlalthmuaka chuan Lunglei khawpui hmasawnna tur ti thei tu chu BJP Pu Modi a kaihhruai sorkar a ni tih sawiin MP inthlan dawnah a sawi thin a, Engineering College, MZU Southern Campus, By pass road tih te a ni a, mahse thlan loh tur an thlan avangin hmasawnna an nei theilo a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

CEO

Chief Electoral Officer (CEO) Dr Lalrozama chuan an hnathawhah mipuite ti bengvar turin chanchinbumite an pawimawh thu leh Chief Election Commissioner pawhin an ni kaltlanga thu thehdarh chu a ngaihpawimawh thu a sawi.

Vawiina chanchinbumite a kawmnaah he thu hi sawiin CEO chuan Election Commission of India atangin thuthar hrang hrang a rawn kal thin thu a sawi a. Election department chu mipuite nena inngheng hnai tak an nih avangin thu puanzar kawngah tan a ngaih thu leh, mipuite tana thu pawimawh puangzar turin media hrang hrang hman tangkai a ngaih thu a sawi a. Chanchinbumite chu thawhhopuiah sawmin Election thuthar te a tam thei ang ber puanzar sak thin turin a ngen a ni.

CEO chuan inthlan awm hnaiin lang lo mahse bye-election leh inthlan engpawh hmachhawn thut thei turin electoral roll tihchangtlun hna an thawk reng tih a sawi a. Block Level Officer (BLO) te puitu tur ngaihtuaha tihchak bakah Block Level Assistant (BLA) te tangkai lehzuala hman an tum thu a sawi a. Special summary revision an neih chhoh dawn thu sawiin pre revision turin ruahmanna siam tura tih an nih thu leh kar hmasa khan an ruahmanna tlangpui an zu hrilh tawh thu a sawi a. Election Commission chuan inthlanna kalpui dan chu international level-a kalpui zel an mitthla tih sawiin India ram

state hrang hrangin khawvel ram dang 36 te tihdan an zirchian dawn thu a sawi a. Mizoram chuan Switzerland a chan dawn thu sawiin Electoral Roll an buatsaih dan leh inthlanna an kalpui dan an zirchian dawn thu a sawi a ni.

Vawiina chanchinbumite an kawmnaah hian chak zawka thu pawimawh puanzar a nih dan tur sawiho a ni a. Chanchinbumite tana training neih a tul thu leh remchang hmasa bera buatsaih a tul thu an sawi a. Chanchinbumite hi an Election Photo Identity Card (EPIC) leh a kaihnawih danga harsatna an neih te an buaipui sak nghal bawk a ni.

<><><>

PM

Prime Minister Narendra Modi-a’n US President Donald Trump-a hnenah Pakistan nena harsatna chingfel tura ramdang inrawlh tumna chu India-in a la pawm ngai lova, ram dang inrawlh a duh ngai bawk lovang, tih a hrilh. Tun hnaia Operation Sindoor chungchanga President Trump nena telephone-a an inbiaknaah he thu hi a sawi a ni.

US President-in a hmalakna avanga India leh Pakistan-in inkahhai puang thei nia vawi engemawzat a sawi hnuah Pu Modi-a hian he thu hi President Trump hnenah hian a sawi a, Foreign Secy, Vikram Misri-a sawi danin, Prime Minister leh President Trump-te hi minute 35 chhung an inbia a, ralthuama India leh Pakistan inbeihna chu India leh America trade deal vangin emaw US hmalakna vang emawa tawp a ni lo tih Pu Trump chu a hrilh a ni.

Pu Modi-a leh President Trump-a te hi Canada-a G7 khawmpui hman paha inbe tura ruahman ni mahse President Trump-a hi US-ah a haw a ngaih leh thut avangin an inbe hman ta lo a ni.

<><><>